



ԵՐԱՆԻ ՆՐԱՆՑ, ՈՐ ՀԵՁ ԵՆ ԵՎ ԽՈՆԱՐՀ (ՔԱՐՈՁ)

«Որ կամիցի ի ձենք մեծ լինել՝ եղիցի ձեր պաշտօնեայ, և որ կամիցի ի ձենք առաջին լինել՝ եղիցի ձեր ծառայ» (Մտթ. Ի 26—27):

Սիրելի հավատացյալներ,

Հետ Հարության 40-օրյա շրջանն է: Մի քանի շաբաթներ առաջ Հայաստանյայց Առաքելական Եկեղեցին տոնախմբեց քրիստոնեական մեծագույն տոնը՝ Չատիկը՝ Քրիստոսի Հրաշափառ Հարության ավետիսը կըրկին ու կրկին ավետելով իր աշխարհասփյուռ զավակներին: Բացենք մեր հոգու դռները հարուցյալ Տիրոջը ներառնելու և նրա օգնությամբ շարունակելու մեր կյանքի ընթացքը: Իսկ ապրել հարուցյալ Քրիստոսի հետ պիտի նշանակեր ընթանալ նրա նախանշած ճանապարհով, պիտի նշանակեր ապրել նրա պատվիրաններով: Բազում են Քրիստոսի պատվիրանները, քրիստոնեական առաքինությունները, և այդ առաքինությանց մեջ կարևորագույններից է խոնարհությունը: Այսօր մեր նպատակն է խոսել ձեզ խոնարհության մասին:

Քրիստոս Իր առաքելության ընթացքում բազմաթիվ առիթներով թե՛ ի տես Իր աշակերտների, թե՛ Իրեն հետևող ժողովրդի, խոսել է խոնարհության մասին, մատնանշել նրա անհրաժեշտությունը ինչպես երկրային կյանքում, այնպես էլ երկնային անմահության հասնելու համար: Հիշենք թեկուզ փարիսեցու և մաքսավորի առակը: Այս երկու մարդիկ էլ տաճար էին եկել աղոթելու Տիրոջը, գոհություն մատուցելու Նրան: Բայց այլ էր նրանցից յուրաքանչյուրի մտադրությունը: Առաջինը տաճար էր մտել ի լուր ամենքի իր անձը բարձրացնելու, մինչդեռ մաքսավորը մեկուսի կանգնած, լուռ, գլխիկոր ու ամոթահար աղոթում էր. «Աստուած քաւեա ցիս ցմեղաւորս»: Ի պատասխան այս

երկուսի աղոթքի լսվում է Աստուծո Միածին Որդու խոսքը. «Ասում եմ ձեզ, սա (մաքսավորը) իջավ իր տունը արդարացած, ոչ թե միւսը, որովհետև ով որ բարձրացնում է իր անձը՝ կխոնարհվի, և ով որ խոնարհեցնում է իր անձը՝ կբարձրացվի» (Լուկ. ԺԸ 14):

Հասել էր Քրիստոսի երկրային առաքելության ավարտը, Նա վերջին պատվիրաններն էր տալիս առաքյալներին ու ժողովրդին: Եվ կրկին անդրադառնում է խոնարհությանը. «Ձեզանից ով կամենա մեծ լինել, ձեր սպասավորը թող լինի, և ով կամենա առաջինը լինել, ձեր ծառան թող լինի»: Այս խոսքերը ասվում են իբրև պատասխան՝ Իր երկու աշակերտների՝ Չեբեթիայի որդիներ Հակոբոսի և Հովհաննեսի խնդրանքի, որոնք հայցում էին Քրիստոսից արքայության մեջ նստել Նրա աջ և ձախ կողմերում, այսինքն՝ արժանանալ Նրա ջնտրիին: Չենք ուզում մեղադրել երկու առաքյալներին, քանի որ նրանք դեռևս չէին լուսավորված Հարության լույսով, նրանց համար Քրիստոսի գաղափարներն ու վարդապետությունը կիսով չափ դեռ մութ էին ու անհասկանալի: Իսկ հետ Հարության նրանք երկուսն էլ, թե՛ Հովհաննեսը և թե՛ Հակոբոսը՝ ողողված Հարության լույսով, նահատակվեցին «Վասն Յիսուսի»:

Թերթենք քրիստոնեական պատմության էջերը՝ սկսած նրա սկզբնավորումից մինչև մեր օրերը: Ինչպե՞ս հիմք դրվեց քրիստոնեության: Նրա հիմնադիրը, որ՝ Աստուծո Միածին Որդին էր, խոնարհվեց իր Աստվածային բարձունքներից, զգեցավ մարդկային կերպարանք, մարդկության մեղքերի տակ կթած բարձրացավ Գողգոթան ի վեր, անարգվեց ու խաչվեց խավարասեր մարդկության կողմից՝ ընդունելով իր ժամանակի

ամենաանարգ մահը: Ու Նրա մահով և ապա Հրաշափառ Հարությանը հիմք դրվեց մի նոր կյանքի, նոր կրոնի:

Ինչպե՞ս տարածվեց քրիստոնեությունը Հռոմեական կայսրության մեջ և նրա ասիմաններից դուրս: Առաքյալներն ու նրանց հետևող ժողովուրդը կարողացան իրենց խոնարհությամբ ու հաստատակամությամբ կոտրել հռոմեական բիրտ կայսրերի համառությունը: Նրանք խոնարհվեցին Ներոնների, Դիոկղետիանոսների և այլոց դաժան ու անմարդկային հալածանքների ու վանգվածային հաշվեհարդարների տակ, բայց նրանց դաժանությունն իսկ չկարողացավ սասանել նորադարձ քրիստոնյաների հավատը, չկարողացավ արգելափակել Լուսիի ու ձյանարտության ճանապարհը:

Ինչպե՞ս տարածվեց քրիստոնեությունը Հայաստան աշխարհից ներս: Նախ՝ հեղվեց Քրիստոսի երկու առաքյալների՝ Թադեոսի և Բարթողիմեոսի սուրբ արյունը՝ բազմաթիվ այլ հավատացյալների հետ, և ապա Սուրբ Գրիգոր Լուսավորիչը իր չարչարանքներով ու անսասան հավատքով համոզեց հայոց Տրդատ թագավորին, որ ինքն է քրոպիչը ձյանարտության ու Լուսիի:

Եվ այսպես աստիճանաբար, քրիստոնեությունը ի գին բազմաթիվ վկաների խոնարհության ու մարտիրոսության ծավալվեց աշխարհի չորս ծագերը, Աստվածային խոսքը ավետվեց ի յուր ամենքի և ամենուր: Հետագա քրիստոնյա սերունդները սրբացրին նրանց, ում արյունը հեղվեց ի սպաս Քրիստոսի Ավետարանի:

«Նա, ով խոնարհեցնում է իր անձը, կը բարձրանա»:

Սիրելի հավատացյալներ,

Պատմությունը մեզ բազում օրինակներ է տալիս՝ վկայելու Քրիստոսի խոսքերի հավիտենական ձյանարտությունը: Հայ ժողովուրդը իր դարավոր պատմության ընթացքում բազում-բազում վավակներ է ծնել, ո-

րոնք այսօր մեզ համար մեծեր են: Մեծեր են իրենց սրբակենցաղ կյանքով, մեծեր են իրենց կատարած գործերով: Հայ ժողովուրդը ծնել է Վարդան ու Վահան, Մաշտոց ու Սահակ, Նարեկացի ու Շնորհալի և բազում ու բազում ուրիշներ, որոնք անմահացել են մեր ժողովրդի սրտում, որոնք այժմ էլ ապրում են յուրաքանչյուր հայի հոգում: Բայց նրանք անմահացել են, ոչ թե որովհետև ձգտել են անմահության, ոչ թե որովհետև գերմարդկային բնություններ ու էակներ են եղել, այլ որովհետև նրանցից յուրաքանչյուրը իր հոգով ու էությանը, խոնարհելով իր անձը, ծառայել է ու սպասավորել իր ազգին, անձնական ու մարմնականը զոհել ի շահ հանրության ու ժողովրդի:

Մաշտոցը հայոց տառերն էր երկնում ոչ թե փառքի ու անմահության, այլ իր ժողովրդի ազգային ինքնության պահպանման ու գոյատևման համար:

Վարդան Ավարայրի դաշտում կռվեց ու թափեց իր սուրբ արյունը ոչ թե փառքի ու անմահության համար, այլ որպեսզի իր ժողովուրդը չստրկացվեր մարմնապես ու հոգեպես:

Նարեկացին մութ քարայրներում, մենության մեջ «ի խորոց սրտի խոսքն» էր առաքում առ Աստված, մարդկային մտքի մեծագույն թռիչքն էր արարում, մարդկային հոգին մերձեցնելու աստվածային բարձունքներին, մաքրելու և անաղարտ պահելու այդ հոգին մեղքից ու աղտեղությունից: Բյուրավոր են օրինակներն այս. «Հաւատք առանց գործոց մեռեալ են առանձինն»: «Մարդու ամբարտավանությունը կկործանի նրան, բայց հեզահոգին փառք կստանա» (Առակ. ԻԹ 23):

Երանի նրանց, որ հեզ են ու խոնարհ, որովհետև նրանք երկնքի արքայությունը պիտի ժառանգեն: Ամեն:

ՌԱԶՄԻԿ ՍՐԿ. ԻՍԱԽԱՆՅԱՆ

